
ФАРҒОНА ВИЛОЯТИ ДЕЛЕГАЦИЯСИ «СЎҒД-2021» ХАЛҚАРО САВДО ЯРМАРКАСИДА МУҲИМ КЕЛИШУВЛАРГА ЭРИШДИ

Бугун, 20 октябрь куни Хўжанд шаҳридаги «Қасри Варзиш» стадионида турли давлатлар ва вилоятларнинг инвестиция ва туризм салоҳиятини ифода этган кўргазмалар ташкил этилди.

Тадбирнинг тантанали очилиш маросимида сўз олган Сўғд вилояти раиси Раджаббой Аҳмадзода ташриф учун меҳмонларга миннатдорчилик билдирди. Хорижий давлатлар, хусусан, Ўзбекистон билан дўстона муносабатлар ривожланиб бораётганини қайд этди.

Шундан сўнг Тожикистон ҳукумати аъзолари, делегациялар раҳбарлари билан биргаликда кўргазмалар кўздан кечирилди. Эътиборлиси, Фарғона вилоятида ишлаб чиқарилаётган маҳсулотлар меҳмон-у мезбонларда илиқ таассурот қолдирди. Тожикистонлик тадбиркорлар, журналистлар катта қизиқиш билдирдилар.

Меҳмон ишбилармонлар билан жойнинг ўзида ҳамкорлик қилиш, инвестиция киритиш масалаларида келишувларга эришилди. Дон, қурилиш маҳсулотлари ва бошқа яна бир қатор йўналишларда 3 млн. АҚШ долларига яқин экспорт шартномалари имзоланди.

Туризм йўналишида ҳам Фарғона ва Сўғд вилоятлари мутасаддилари ўртасида 1,5 млн. АҚШ доллари миқдоридаги меморандумларга имзо чекилди.

Халқаро савдо ярмаркасида вилоятимиздан қатнашган тадбиркорлар томонидан жами бўлиб 11 млн. 500 минг АҚШ долларлик шартномалар тузилди.

Шу куни икки вилоят масъуллари савдо-инвестициявий ва туризм алоқаларини янада жонлантириш бўйича чора-тадбирлар юзасидан келишиб олдилар.

Фарғона вилояти делегациясининг Тожикистон Республикасининг Сўғд вилоятига қилган икки кунлик ташрифи ўз якунига етди.

Бизни ижтимоий тармоқларда кузатинг [Facebook](#),
2021-10-20 19:19:09